

CUSSEGL GROND

Sessiun da favrer 2023

Dumonda Oesch concernent la diversidad en gremis directivs chantunals, en cumissiuns e tar represchentanzas chantunals

La participaziun adequata d'omaduas schlattainas a tuttas incumbensas politicas, economicas e socialas è ina necessitad. Quai per motivs demografics, perquai ch'en il futur vegnan bler dapli persunas a sortir da la vita professiunala che succeder, ma er per motivs economic, perquai che teams maschadads cuntanschan megliers resultats. Quai è incontestà.

Finamiras quantitativas èn in med effizient per procurar per la diversidad giavischada. La Confederaziun ha realisà quai en il rom da la revisiun dal dretg d'aczijs: A partir dal schaner 2021 vala en interpresas grondas quotadas a la bursa cun sedia en Svizra da nov ina valur directiva da 30 pertschient dunnas en il cussegl d'administraziun e da 20 pertschient dunnas en la direcziun. Tgi che n'observa betg las valurs directivas, sto declarar pertge.

Tant en l'Ordinaziun davart la realisaziun da la public corporate governance per il chantun Grischun sco er en l'Ordinaziun davart las collavuraturas ed ils collavuraturs en uffizi accessoric dal chantun Grischun ed autras normas giuridicas respectivas mancan valurs directivas per diversifitgar. L'experienscha mussa ch'i dovra ina basa pli lianta, sch'ins vul realisar ils princips da l'egualitad da las schlattainas sco er da la diversidad da las opiniuns en moda consequenta e credibla.

Ultra da garantir la diversidad ston ins er tschentiar la dumonda davart l'indipendenza da las candidatas e dals candidats. Sch'i resultan dependenzas cun surpigliar mandats en cussegls d'administraziun en moda cumulada, considerain nus quai sco critic.

Nus vulessan ussa gugent savair da la Regenza, co che la situaziun en il chantun Grischun sa preschenta concernent l'occupaziun da gremis da direcziun e gremis spezialisads d'influenza chantunala. Concretamain supplitgain nus la Regenza da responder las suandantas dumondas:

1. Co statti cun la diversidad tar las direcziuns dals uffizis che ston vegnir occupadas da la Regenza e.u.v., tar las cumissiuns sco er tar las represchentanzas chantunals? Nus supplitgain per infurmaziuns davart la repartiziun da las schlattainas, da la vegliadetgna, da la lingua e da l'appartegnientscha ad ina partida.
2. Tge dimensiuns da diversidad resguarda la Regenza ultra da quai tar l'occupaziun da gremis?
3. Ha la Regenza elegi ils ultims 3 onns en in cussegl d'administraziun u en in gremi directiv persunas ch'eran gia commembras en in auter cussegl d'administraziun u en in auter gremi directiv en il chantun Grischun?
4. Co vesa la Regenza da princip la problematica da la cumulaziun d'uffizis?

Cuira, ils 15 da favrer 2023

Oesch, Perl, Brandenburger, Bardill, Baselgia, Bavier, Bergamin, Biert, Bischof, Bisculm Jörg, Bleuler-Jenny, Cahenzli-Philipp (Vaz Sut), Candrian, Casutt, Danuser (Cuira), Degiacomi, Della Cà, Dietrich, Dürler, Hoch, Hofmann, Kappeler, Kreiliger, Mazzetta, Metzger, Morf, Müller, Nicolay, Pajic, Preisig, Rageth, Rettich, Roffler, Rusch Nigg, Rutishauser, Saratz Cazin, Spagnolatti, Städler, von Ballmoos, Zaugg-Ettlin